



Baselgia da Neukirch en Stussavgia.



Caplutta da Nossadonna dallas dolurs a Pigniu.

FOTOS MAD

## Fotografias da baselgias e capluttas dalla Surselva egl internet

■ **Andreas Keller ei staus biars onns intendant dalla «Academia internaziunala da Bach» a Stuttgart. El ei buca mo in oreifer musicist, mobein era in fotograf incarnau e passiunau. Baselgias e capluttas han per el ina calamita tut speciala.** El ha fotografau numerus edificis sacralis e lur custeivladads a Stuttgart e contuorn, en la regiun dil Lag da Constanza ed en Surselva. *Andreas Keller* e sia dunna passentan gia dapi biars onns lur vacanzas da stad a Sogn Benedetg. Fotografias da fluras e da baselgias e capluttas dalla Surselva dattan perdetga da lur hobi, da lur plascher e pis-siun.

Sin la pagina d'internet [www.kirchen-online.org](http://www.kirchen-online.org) san ins mirar ed admirar numerusas fotografias da baselgias e capluttas dalla Surselva. El setracta mo d'ina schelta dil grond «material» dil fotograf.

Ins anfla era biars detagls ed ensemen cun las fotografias indicaziuns dil fotograf, explicaziuns preziasas d'*Erwin Poeschel* e renviaments alla gronda lavur da



Sogn Luregn e sogn Bistgaun a Laus.

*Hans Batz.* Cun quellas fotografias vul *Andreas Keller* mussar la riezia culturala dil edificis sacralis ed animar dad ir a visitar quellas casas da Diu e da mirar las obras d'art.

Ins anfla egl internet fotografias da baselgias e capluttas che sesanflan els suandonts loghens:

Acla (Medel), Acletta (Mustér), Biscuolm (Medel), Cavardiras, Cumpadials, Curaglia, Darvella, Fuorns (Medel), Glion, Laus, Lucmagn, Mompé Tujetsch, Mustér, Mutschnengia (Medel), Pali (Medel), Pigniu, Platta, Runs (Rabius), Sogn Benedetg, Soliva (Medel), Stussavgia (Neukirch, Platz, Thalkirch, Tenna), Sumvitg, Surrein, Trun, Valenda, Versomi, Vrin. Ins anfla era la via dalla crusch da Sumvitg viers Clavadi e quella d'Aluis Carigiet en la Casa S. Martin a Trun.

Ins sa mo recumandar da mirar las fotografias egl internet e da schar animar da visitar las biaras e bialas baselgias e capluttas dalla Surselva.

Arnold Spescha

## Mintga rap dumbra: rimnar daners per mummas en miseria

■ **(cp) La tiarza classa dil profil E (KV) dalla Scuola da formaziun Surselva ha rimnau daners per mummas en miseria. L'emissiun «Mintga rap dumbra» da DRS3 ha motivau la classa per quei project.** La damaun allas 06.50 ei ina gruppida ida cul tren da Glion a Cuera, nua ch'els han vendiu cornets, suc d'oranscha, caffè e tschugalata. Ulterioras gruppas ein serendidas els vitgs da Surrein, Mustér e Rueras ed han vendiu tustgets fatgs sez.

Suenter la lavur el tren e la vendita da tustgets ein els s'entupai avon il center dil Coop e Migros a Glion. Bia bunas causas han ins saviu cumprar e tgi che haveva freid ha giu la pusseivladad da sescaldar cun in bien caffè ni punsch.

Auters scolars ein serendi ella garascha sutterrana dil Coop ed han schubergiau autos (fatg il tschetschapuorla). Cura che la clientella dil Coop ei turnada dallas cumissiuns era igl auto ina tarlischur.

Cun il sustegn dil Sursilvans e las di-



versas acziuns dil scolars havein nus rimnau 4300 francs.

La Viafier retica, Coop, Migros ed il Café Feuerstein han possibilitau e susteniu nus per quei project. In grond engraziament.

*Center da formaziun Surselva, la classa E3*

**La tiarza classa dil profil E alla Scuola da formaziun Surselva ha rimnau daners per mummas en miseria.**

MAD

### ■ FLEM

## La Casa melna a Flem sefatschenta cun motos

**(ag) Ils amitgs dallas maschinis veglias sin duas rodas astgan selegrar. La Casa melna a Flem presenta a partir dalla sonda vargada in schatg dalla construcziun svizra da temps passai.**

Ton la fantasia, igl inschign tecnic sco il desseg dallas maschinis exponidas ella Casa melna lain surstar. Motos da derivonza svizra, ina domena enconuscenta probablamein sulet als amatur da motos vegls. E gest la Casa melna a Flem porchesta investa ell'entschatta dil velo a motor nua ch'ils constructurs svizzers appartenevan alla avantgarda l'entschatta dil 20avel tschentaner. Fabricats dallas marcas Allegro ni Zehnder pon strusch svegliar la regurdanza pli. Antruras eran quellas marcas part dalla industria innovativa da motos en Svizra. Igl emprem moto producius en seria deriva bein dalla Tiaratudestga. Igl onn 1894 eis el vegniu fabricaus a Minca. Sulet in onn pli tard annunzia igl industrial Karl Blei-

dorn la patenta per igl emprem moto svizzer. Bleidorn venda sia interpresa 1913 ad Adolph Saurer e lez retscheiva il fundament per sviluppar l'interpresa ad ina dallas pli renomadas firmas svizras activas ella construcziun dad autos da vitgira e maschinis da textilia. Saurer ei historia e cun el nundumbrevilas ulterioras marcas meins enconuscentas. La Svizra dumbra egl emprem centenari dil 20avel tschentaner buca meins che 30 firmas che construevan autos ni motos. Ina biala schelta dallas maschinis d'antruras presenta la Casa melna sut il tetel «Alpenknarren». Ina schelta ord la historia da 110 onns construcziun da motos. Biebiens 150 producents da «töfs» ein stai activs durant dapli ch'in tschentaner en Svizra. Oz existan sulet aunc singuls.

**L'exposiziun «Alpenknarren» ella Casa melna a Flem ei aviarta mintgamai il margis entochen la dumengia naven dallas 14.00 entochen las 18.00. Ella cuozza entochen ils 21 d'october.**